

nutans. EPIDENDRUM, caule simplici, foliis ovato-lanceolatis amplexicaulibus; floribus subspicatis nutantibus; lamina labelli triloba, lobo intermedio tridentato. *Prodr.* p. 121.

Parasiticum in arboribus Montium
Jamaicae occidentalis. 4.

Radices crassae, filiformes, longae, albae.

Caulis (interdum plures aggregati) 1-2 pedalis, crassus, simplex, foliosus, subteres, subrectus, l. arboribus horizontali situ adnascens.

Folia sessilia, vaginantia, amplexicaulia, alterna, oblique patula, ovato-lanceolata, acuta, plana, subtus levissime carinata, integra, longitudinaliter lineata, glabra, subcoriacea.

Vaginae (seu basis foliorum) caulem arcte cingentes, teretes, lineatae, glabrae, rubicundae.

Peduncululus terminalis, solitarius, longitudine fere foliorum, (spithameus,) compressiusculus, vaginis aliquot remotis lanceolatis albido-purpurascentibus munitus, glaber.

Flores terminales, subspicati, approximati, 20-30, sessiles, majusculi, lutei, spicam nutantem referentes.

Bractee lanceolato - lineares, carinatae, longitud. saepe germinis, pallidae.

Petala 5. longitud. aequalia, patula. tria *exteriora* ovato - lanceolata, acuta, lateralia subfalcata, planiuscula, integra, elevato - striata, extus luteo - rufescentia. duo *interiora* linearia acuminata.

Labellum columnae basi adnatum, amplectens. *Lamina* horizontaliter deflexa, triloba; *lobis* lateralibus ovatis integris convexis; *intermedio* tridentato: *dentibus* lateralibus cornuum instar erectis, medio deflexo.

Calli duo prope faucem, unde ad apicem lobi *intermedii* *fulci* tres elevati.

Columna labello brevior, erecta, teres, apice dilatata, marginibus biloba.

Anthera quadrilocularis in fovea apicis columnae, *corpuscula* solitaria oblonga, pedicellata tegens.

Capsula oblonga, 6 - carinata, magna.

OBS. Floret Octobri.
